

四庫全書

集部

欽定四庫全書

集部  
梁谿集  
總目  
卷一至三

詳校官庶吉士臣張溥

侍讀臣孫球覆勘

總校官知縣臣楊懋珩

校對官中書臣潘奕雋

謄錄監生臣莊承簪

欽定四庫全書

集部四

梁溪集

別集類三宋

提要

臣等謹案梁溪集一百八十卷附錄六卷宋  
李綱撰綱有建炎時政記已著錄是集首載  
宋少保觀文殿大學士陳俊卿序謂綱少子  
秀之哀集其表章奏劄八十卷而詩文不與  
焉晁公武讀書志則作一百五十卷陳振孫

書錄解題則作一百二十卷蓋後人續以詩  
文合編互有分併已非復秀之之舊本此本  
賦四卷詩二十八卷禱文一百三十八卷而  
以靖康傳信錄三卷建炎進退志四卷建炎  
時政記三卷俱編入集中又以年譜行狀之  
類六卷附焉與晁陳二家所錄均為不合又  
非宋本之舊矣網人品經濟炳然史冊固不  
待言即以其詩文而言亦雄深雅健磊落光

明非尋常文士所及徒以喜談佛理故南宋  
諸儒不肯稱之然如顏真卿精忠勁節與日  
月爭光固不能以書西京多寶塔碑作撫州  
麻姑壇記遂減其文章之價也集中有補宋  
璟梅花賦自序謂璟賦已佚擬而作之其文  
甚明元劉壎隱居通議所載璟賦二篇皆屬  
偽本明田藝蘅留青日札乃稱得元鮮于樞  
手書璟賦急錄傳之樞之真蹟旋燬核其文

句大抵點竄綱賦十同七八其為依託顯然  
然亦見綱之賦格置於唐人之中可以亂真  
矣乾隆四十六年五月恭校上

總纂官臣紀昀臣陸錫熊臣孫士毅

總校官臣陸費墀

梁谿集原序

國朝祖宗以仁覆天下而不右武事然垂二百年更外  
寇之變者三皆得人以任其事景德契丹之變寇萊公  
任之康定元昊之變范文正公韓忠獻公任之靖康金  
人之禍比是二者尤鉅而丞相隴西李公亦慨然以身  
當其變蓋天之祐宋不于其兵而于其人是數君子者  
之事君不于其躬而于其國其事之濟否則有命與數  
存焉要之皆忠烈英特之士也予既敬服數公之行事

因欲覽觀其遺文萊公它文不甚見于世獨其詩傳蓋百有餘篇辭健而格高旨深而思遠真作之傑者也至于文正忠獻則家集俱在其言之形於文字議奏之間者或簡重而壯偉或詳明而剴切蓋與其謀謨勲業惟稱李公近與予耳目接私以不得其文為恨淳熙丙申予帥三山其子秀之裒集其文以示予求序以冠其端蓋表章奏劄至八十卷而詩文猶不與焉予讀之而嘆曰詳哉其言之也世之有其學者常患乎無其材有其

材者常患乎無其節三者備矣然使其辭之不達則不  
足以動人主之聽言之不文則不足以永後世之傳是  
以君子貴其全也公學本于經才見于用節著于論水  
災贊禪議之日是其章較蓋天下之所共知焉予竊怪  
方敵騎闖城之際在廷之臣爭為講解遷避之說公子  
然孤忠未易以口舌爭卒能感悟萬乘為堅牢之策以  
何道而致然及觀公之議奏明白條暢反覆曲折其敘  
成敗利害灼然如在目前宜乎感悟明主之聽而亟從

之也使公之謀盡用則敵騎必無再下之禍而其勲業  
可以繼寇萊韓范矣惜乎其奪於讒而不之竟也光堯  
中興因天下之望而首相公十議所陳規摹弘遠矣劉  
麟之役公雖在外且畫三策六條以獻王倫之使公復  
憤慨抗疏以爭之與時論不合不顧也嗚呼其可謂忠  
也矣然則公之勲業雖不克大就而其所奮立陳述足  
以暴于後世況又其言之文哉昔東坡先生謂諸葛孔  
明不以文章自名而開物成務之姿綜練名實之意自

見于言語出師之表簡而盡直而不肆而鄭亞謂李衛  
公蘊開物致君之才居丞弼上公之位建靖難平戎之  
策垂經天緯地之文嗚呼若公者可謂兼之矣予既諾  
秀之之請奪于多事未暇綴思後三年歸自金陵乃始  
書而歸之某月某日陳俊卿序

--	--	--	--	--	--	--	--

欽定四庫全書

集部四

梁谿集總目

別集類三 宋

卷一

賦

卷二

賦

卷三

賦



卷四

賦

卷五

詩

卷六

詩

卷七

詩

卷八

詩

卷九

詩

卷十

詩

卷十一

詩

卷十二

詩

卷十三

詩

卷十四

詩

卷十五

詩

卷十六

詩

卷十七

詩

卷十八

詩

卷十九

詩

卷二十

詩

卷二十一

詩

卷二十二

詩

卷二十三

詩

卷二十四

詩

卷二十五

詩

卷二十六

詩

卷二十七

詩

卷二十八

詩

卷二十九

詩

卷三十

詩

卷三十一

詩

卷三十二

詩

卷三十三

表本詔書

卷三十四

表本詔書

卷三十五

擬制詔

卷三十六

擬制詔

卷三十七

擬制詔

卷三十八

擬制詔

卷三十九

表劄奏議

卷四十

表劄奏議

卷四十一

表劄奏議

卷四十二

表劄奏議

卷四十三

表劄奏議

卷四十四

表劄奏議

卷四十五

表劄奏議

卷四十六

表劄奏議

卷四十七

表劄奏議

卷四十八

表劄奏議

卷四十九

表劄奏議

卷五十

表劄奏議

卷五十一

表劄奏議

卷五十二

表劄奏議

卷五十三

表劄奏議

卷五十四

表劄奏議

卷五十五

表劄奏議

卷五十六

表劄奏議

卷五十七

表劄奏議

卷五十八

表劄奏議

卷五十九

表劄奏議

卷六十

表劄奏議

卷六十一

表劄奏議

卷六十二

表劄奏議

卷六十三

表劄奏議

卷六十四

表劄奏議

卷六十五

表劄奏議

卷六十六

表劄奏議

卷六十七

表劄奏議

卷六十八

表劄奏議

卷六十九

表劄奏議

卷七十

表劄奏議

卷七十一

表劄奏議

卷七十二

表劄奏議

卷七十三

表劄奏議

卷七十四

表劄奏議

卷七十五

表劄奏議

卷七十六

表劄奏議

卷七十七

表劄奏議

卷七十八

表劄奏議

卷七十九

表劄奏議

卷八十

表劄奏議

卷八十一

表劄奏議

卷八十二

表劄奏議

卷八十三

表劄奏議

卷八十四

表劄奏議

卷八十五

表劄奏議

卷八十六

表劄奏議

卷八十七

表劄奏議

卷八十八

表劄奏議

卷八十九

表劄奏議

卷九十

表劄奏議

卷九十一

表劄奏議

卷九十二

表劄奏議

卷九十三

表劄奏議

卷九十四

表劄奏議

卷九十五

表劄奏議

卷九十六

表劄奏議

卷九十七

表劄奏議

卷九十八

表劄奏議

卷九十九

表劄奏議

卷一百

表劄奏議

卷一百一

表劄奏議

卷一百二

表劄奏議

卷一百三

劄子

卷一百四

劄子

卷一百五

狀

卷一百六

狀

卷一百七

狀

卷一百八

書

卷一百九

書

卷一百十

書

卷一百十一

書

卷一百十二

書

卷一百十三

書

卷一百十四

書

卷一百十五

書

卷一百十六

書

卷一百十七

書

卷一百十八

書

卷一百十九

書

卷一百二十

書

卷一百二十一

書

卷一百二十二

書

卷一百二十三

書

卷一百二十四

書

卷一百二十五

書

卷一百二十六

書

卷一百二十七

書

卷一百二十八

書

卷一百二十九

書

卷一百三十

啟

卷一百三十一

啟

卷一百三十二

記

卷一百三十三

記

卷一百三十四

序

卷一百三十五

序

卷一百三十六

序

卷一百三十七

序

卷一百三十八

序

卷一百三十九

序



卷一百四十

贊

卷一百四十一

贊

卷一百四十二

頌箴銘辭

卷一百四十三

論

卷一百四十四

論

卷一百四十五

迂論

卷一百四十六

迂論

卷一百四十七

迂論

卷一百四十八

迂論

卷一百四十九

迂論

卷一百五十

迂論

卷一百五十一

迂論

卷一百五十二

迂論

卷一百五十三

迂論

卷一百五十四

迂論

卷一百五十五

雜著

卷一百五十六

雜著

卷一百五十七

雜著

卷一百五十八

雜著

卷一百五十九

雜著

卷一百六十

雜著

卷一百六十一

題跋

卷一百六十二

題跋

卷一百六十三

題跋

卷一百六十四

祭文辭疏

卷一百六十五

祭文辭疏

卷一百六十六

碑誌

卷一百六十七

碑誌

卷一百六十八

碑誌

卷一百六十九

碑誌

卷一百七十

碑誌

卷一百七十一

靖康傳信錄

卷一百七十二

靖康傳信錄

卷一百七十三

靖康傳信錄

卷一百七十四

建炎進退志總序

卷一百七十五

建炎進退志總序

卷一百七十六

建炎進退志總序

卷一百七十七

建炎進退志總序

卷一百七十八

建炎時政記

卷一百七十九

建炎時政記

卷一百八十

建炎時政記

欽定四庫全書

梁谿集卷一

宋 李綱 撰

賦一

武夷山賦

含笑花賦

幽蘭賦

日者賦

荔支賦

蓮花賦

武夷山賦

并序

武夷山水之勝為七閩最圖志載之詳矣予閩人也

遊宦四方每以未至其下為恨宣和改元承乏螭頭  
寓直左省晝寢夢遊山間四顧峯巒玉色秀美瓌奇  
不可模狀既覺欣然竊意所夢殆非塵世也已而都  
城積水奏疏論事謫官沙陽渡淮歷浙道江南入閩  
境遂遊武夷道士導予乘小舟泛九曲溪抵晞真館  
奇峯怪石顧接不暇迴舟雪作山色盡白恍如夢中  
怛然驚笑信乎好慕之極達乎精神而出處分定非  
人力之所能致也留山中賦詩幾五十篇又廣其意

而為之賦予於武夷可謂無負亦足以償平昔之願  
矣其辭曰

太虛寥廓浮清凝濁融為川瀆結為山嶽山嶽之奇萃  
于坤倪秀氣磅礴實鍾武夷武夷之山蜿蜒鬱蟠作鎮  
南服千里奠安噴雲洩雨噫風嗽霧蔽虧日月變移寒  
暑崖谷窈窕峯岫巖嵒雕鏤刻削孰尸其功一溪九曲  
演漾寒淥貫于山中鳳翥虬威洞戶杳然棲神宅仙蟬  
蛻羽化靈骨猶傳雲封霧鎖玉潤金堅稽于祕籍是為

昇真化之天其瓌偉絕特之觀則有幔亭之麓天柱之  
峯鐵障延袤鑑池空濛巖嘯彫虎潭藏老龍儼金仙之  
容睟粲遊女之肌紅儲芝玉于二廩鑄藥乳于三鍾聳  
層峯之疊翠落飛瀑之長虹千巖萬壑競秀爭雄蕩心  
駭目不可殫窮其仙聖遊戲之地則有換骨之巖賭婦  
之石掌印掬蹤膝存跪跡繪胎禽之縹緲插仙舟於罅  
隙留丹竈於層巔置雞棲於峭壁組織就而杼軸空篇  
翰終而几案寂案圖以求祕怪難測其植物則有翠栢

毛竹綠李丹橘翳蒼芬芳擢榦垂實其動物則有舞鶴  
鳴鷗遊羊戲鹿棲息飛翔分羣萃族其內則有瓊樓珠  
殿玉圃芝田創見天地自開山川靈仙之所周旋也其  
外則有長松茂草異卉嘉葩枕流漱石朝煙夕霞幽邃  
之所考槃也合而觀之山意深水容湍石色溫潤溪流  
屈盤地靈而木秀景寂而雲閒信能騰譽今古垂光簡  
編廁三十六洞而別為一天也惟昔仙君來晏曾孫彩  
梁虹亘幔屋雲屯翠旌絳節紫褥芳裯虛座鼎設華筵

翼分漿瓊液玉羞鳳脯麟鏘金石之間作奏古曲曰賓  
雲歌人間之可哀歎光景之易曠紛鸞鶴以迴馭但流  
水與空山悵真遊之已遠時笙簫之夜聞此又詭異恍  
惚叵得而具論也若夫岱宗太華之穹崇終南太行之  
險阻或峻極而降神或登臨而小魯四明天台衡嶽廬  
阜度長絜大雖雄偉之不侔而幽邃巧妙固不可同日  
而語也爰有狷介之士學陋識迂誤入世網偶聯簪裾  
跡朝市而心山林究地志而閱仙書馳精神於夢寐覲

幽眇於畫圖歲崢嶸以邁盡因謫宦而假途步煙霞之  
岑寂仰神仙之有無覽魏子之遺躅訪劉公之舊廬嘉  
泉石之可樂寄吟哦以自娛倒冠落佩與世濶疎眷茲  
山而無斃將徇其愚而隱居者乎

含笑花賦

并序

南方花木之美者莫若含笑綠葉素榮其香郁然是  
花也方蒙恩而入幸價重一時故感而為之賦其辭  
曰

夫何嘉木之姝嫿兮，藹芬馥之芳容。結孤根於暖地兮，披素豔於幽叢。炫麗景之遲遲兮，浥零露之濃濃。默凝情而不語兮，獨含笑於春空。其笑伊何粲兮，巧倩洞戶初啓。曲欄乍見，驚鄰女之窺牆。疑寵姬之教戰，鄙妖姿之齟齬。謝啼粧之半面態，有餘情忽焉改觀。國香無敵，秀色可餐。抱貞潔之雅志，舒婉孌之歡顏。寧解頤而啟齒，方墮珥而歌冠。苞溫潤以如玉，吐芬芳其若蘭。俯者如羞仰者如喜，嚮日嫣然臨風莞爾。豈褰幃而觀，跛將

忘懷於射雉輕可買之千金重迴眸之百媚拔類邁倫  
孰與為比泛澌酷烈綽約嬋娟翠葉擁鬢綠萼承顴嗅  
之彌馨察之愈妍信色香之俱美何扈芷而握荃若夫  
萱草忘憂合歡蠲忿採杜若於洲中褰芙蓉於澤畔甄  
菊百畦滋蕙九畹絜長度美固不可一槩而論也方將  
移自南國置之玉堂違霜霰之凄冷依日月之未光憑  
雕檻而凝彩度芝閣而飄香破顏一笑掩乎羣芳誠可  
以承天寵而植椒房者乎

幽蘭賦 并序

卷一

蘭有二種華以春者似蕙華以秋者似菊楚辭曰秋  
蘭兮青青綠葉兮紫莖又曰春蘭兮秋菊長無絕兮  
終古今世人之所識者素葩叢本特春蘭耳予嘗得  
一種蘭於亡友蕭子寬家綠葉紫莖至秋始華如楚  
辭之所賦其華似菊而色微紫其香似春蘭而加芳  
食之味尤辛甘可以調羹曹子建七啟於餽饌之妙  
言紫蘭丹椒施和必節滋味既殊遺芳射越乃知茲

蘭可食其為秋蘭無疑也二蘭皆喜生於高山深林  
間寂無人之境則芬芳郁烈茂盛而遠聞移而置於  
軒庭房室之間不過一再歲華益鮮而香益微蓋其  
天性如此故古人又以幽蘭目之與夫山林隱遯之  
士耿介高潔不求聞達於人而風流自著者亦何以  
異故感而賦之其辭曰

相百卉之芳菲兮待培植而乃成何茲蘭之異稟兮處  
幽僻而方興高山崔嵬而龍從兮深林杳杳以冥冥下

波濤之噴激兮上雪霰之飄零邈人跡之不到兮蘭於  
焉而獨馨言茁其芽載擢其英春與蕙兮偕秀秋與菊  
兮並榮或素葩而叢本或綠葉而紫莖雖春秋之異種  
豈殊德於幽貞耿介自許芬芳誰與久而不知其香晦  
而不改其度榮何謝於光風瘁何傷於白露配芝桂以  
為友奚蕭艾之能侶類同心之契合比明德之欣附淑  
人君子愛而不忘蒸以為藉沐以為湯紉之為佩刈之  
為防實有取於雅操匪徒慕夫國香若夫出自故山同

夫小草資耳目之嘉玩供園林之幽討雖得托於孤根  
蓋已違其所好譬猶高潔之士隱遯之人蹈山林而長  
往友麋鹿而同羣付功名於脫屣等富貴於浮雲室雖  
邇而人則遠可得聞而不可見有泉石之枕漱無猿鶴  
之驚怨晦其跡而彌芳懷其道而愈顯子真谷口德公  
鹿門二子食薇於首陽四皓採芝於商山名與實兮兼  
茂心與跡兮俱閑播清芬於今古亦何以異於幽蘭

日者賦 并序

世之術士託五行以售其說冒利貪進之徒爭往問焉予疾之作日者賦以見意其辭曰

李子既抵沙陽有日者踵門而告之曰人所稟命不離五行更相更王相殺相生一償一起代廢代興吾術以人之始生歲月日辰之支干推步斟酌而知其貴賤壽夭於未萌百不失一粲然著明今子奮身寒微早蒙識擢徊翔省寺緩步臺閣載筆螭蚬方得所託朝遊於清都鈞天帝居之所夕貶於閩粵礪山僻遠之郭翩若雲

鴻之鍛翮脫若霜林之隕擗捨彼寵榮甘此落寞豈人  
力之能致蓋亦命有所縛而已然而方泰而窮已否則  
通時有利鈍各繫其逢昔退之於潮陽遇逆旅之毛翁  
期以秩位後悉符同今我欲語子以未來子豈有意於  
相從乎李子笑而應之曰子來前萬物林生盈乎載燾  
大化居中猶輪是蹈羽鱗毛介灌莽叢草一氣甄陶衆  
形醜好茫乎天運窈爾神造忽焉為人賦情肖貌自少  
得壯自壯得老動靜作止飲啄夢覺或當時而榮華或

失勢而枯槁有制之者幽深奧渺今予乃欲以生辰之  
支干區區寸計而銖較摘抉杳微期以執效譬猶海以  
蠡測鐘以筵考雖或億中竈焉知夫天道且夫人之所  
同者歲月我之所獨者日辰四海之廣生齒之繁一日  
一辰之間其孕育者幾人或孿生而吉凶異或殊稟而  
禍福均謂宜盛而更衰謂方屈而還伸替亂厖雜顛倒  
紛綸汪洋渺漫千緒萬端叅錯重出不可究陳稽之於  
古蓋所未聞肇自隋唐是為貪位慕祿嗜進之本根吾

方聞此何以語云昔者聖賢馳驚望道莫見墨突不黔  
孔席不暖或版築而弼傳或束縛而相管呂八十而始  
遇甘十三而已顯或奮身於奴僕或拔跡於畝畎或疏  
封而殖醢或徒步而鼎鉉禍福倚伏吉凶展轉消息盈  
虛晦明舒卷俄而可度天道亦淺且夫洛陽帝都多近  
臣南陽帝鄉多近親方襁褓而垂紫紱雖葭莩而擁朱  
輪冠蓋車馬爛其盈門蓋亦幸耳豈咸值乎貴神長平  
之戰士卒疊跡而阬覆甘露之事卿相駢頸而勦戮屠

洗之冤不遺於噍類誅夷之慘連逮於三族或嬰黨錮之禍或罹羅織之獄亦云不幸豈盡臨於殺局幸與不幸似夫偶然偶然之中有數存焉幹流而遷或推而還震蕩迴薄胡可勝言主張翕闢孰司其權命實制之必原於天未形有分且然無間何有夫歲月日辰之支干是以君子樂天而知居易以俟不戚戚於貧賤不汲汲於富貴靜則安土而敦乎仁動則見險而止乎智不立巖墻以蹈危不為軒冕而肆志一晦一顯與道宛轉一

止一行與道翱翔或出或處惟道是與或語或默惟道  
是適安時處順知其不可奈何故無入而不自得也且  
夫取舍在人可否在時時或未然強進何為寧出入若  
無心之雲將炫燿若干陽之霓乎寧昂昂如野鶴將逐  
逐如家雞乎寧曳尾如塗中之龜將捐生如太廟之犧  
乎寧退而有考槃之樂將進而有履虎之危乎寧汨汨  
守抱甕之拙將俯仰隨桔槔之機乎寧執志以固守將  
逐物以轉移乎昔者屈原放三湘而卜居禹錫謫九年

而何卜子雖不才自信甚篤守此拙愚忘彼寵祿達非  
我榮窮非我辱從吾所好何有吉凶之於禍福日者俯  
而慙仰而歎不得所對逡巡而辭退

荔支賦并序

張曲江嘗賦荔支美則美矣然未盡善也予來閩中  
始得食其生者因感而賦之其辭曰

伊天地之大美鍾火德於炎方結荔支之嘉實稟純氣  
於至陽含滋潤於雨露違嚴凝於雪霜碧葉素榮縹蒂

丹房膚如龍鱗顆如裹囊絳綃為殼白玉為瓢液貯甘露核藏丁香醞難言之妙味吐自然之清香此荔支之大略也全而觀之丸如丹鳳之方卵而未雛破而窺之瑩如老蚌之既剖而見珠掇而出之粲如姣姬褪紅裳而露玉膚咀而嚼之旨如瓊醴吸沆瀣而羞醍醐談辨莫及丹青難圖百果退避孰敢爭腴至如厥包橘柚先薦含桃嶺表龍眼西域蒲萄色沮情惡遜美推高矧夫剝棗浮瓜來禽青李張公大谷之梨梁侯烏桺之柿曾

何足以比萬分之一二哉秋夏之交蒸暑歆然畏景馳  
至薰風入絃著花結實耀日含烟一望萬株列於名園  
璀璨熒煌若繁星之麗天一食千顆置之華筵勻圓磊  
落若火齊之堆盤溢甘芳於齒頰實元氣於丹田宿醒  
可解沈疴可痊若夫色味與香變於三日曝之為乾漬  
之以蜜泛鯨海之巨航入金張之要室譬如神藥致佳  
人之尸千金市駿馬之骨氣格精神初不得其髣髴也  
昔者曲江嘗為之賦寓意卒章惜其不遇殊不知草木

之性各安其土玩物喪志亦所不取開元之末妃子最  
憐萬里驛致來自蜀川死百馬於山谷望一騎而嫣然  
荔支則遇而天下病焉爰有狷介之士負罪遠謫適丁  
其時偶得而食不煩傳送之勞以資口腹之適快平生  
之素願飽珍味而無斃正猶衛懿不可以好鶴而幽人  
得之適所以增其逸阮籍之徒得全於酒而羲和湎淫  
乃廢時而亂日且食荔支此非我力

蓮花賦 并序

釋氏以蓮花喻性蓋以其植根淤泥而能不染發生  
清淨殊妙香色非他草木之華可比故以為喻宋之  
問歐陽永叔皆嘗賦之清便富豔然未嘗及此予暇  
日訪羅疇老修撰見其園池蓮華盛開因感而為賦  
極其美而卒歸之於正云其辭曰

偉哉造物之播氣也天地絪縕陰陽蕩摩植物得之發  
為奇葩葩之甚奇莫如蓮華擢修幹於波瀾結芳根於  
泥沙氣馥芝蘭彩豔雲霞相草木之芳菲孰色香之可

加綠水如鏡紅裳影斜乍疑西子臨谿浣紗菡萏初開  
朱顏半醺又如南威夜飲朝歌亭亭煙外凝立逶迤又  
如洛神羅襪凌波天風徐來妙響相磨又如湘妃瑟鼓  
雲和嬌困無力摇摇纖柯又如戚姬楚舞婆娑風雨摧  
殘飄零紅多又如蔡女蕩舟抵訶爾乃藕埋玉骨花炫  
新妝綠荷倚蓋翠的連房脩莖聳碧嫩蘂搖黃貯盈盈  
之真色泛苒苒之天香斂若凝羞婉若含笑仰若吟風  
俯若窺沼波靜露寒風清月曉動嬉戲之遊魚來翩翻

之白鳥藹江湖之秋思增園亭之幽渺則有高世之士  
味道之人悟色香之妙覺獲圓通於見聞深契無生不  
離根塵豈止玩其英華攬其芳芬而已哉言觀其本生  
於淤泥言觀其末出於清漪處汙穢而不染體清淨而  
不移至理圓成熟能知之西方之人強名為佛以茲取  
喻其誰曰不是以毗盧之坐千葉齊敷華藏之海十方  
咸出惟植根之得地爰開華而結實功用既圓退藏於  
密返觀自性之蓮華又何資於造物

欽定四庫全書



梁谿集

梁谿集卷一

欽定四庫全書

梁谿集卷二

宋 李綱 撰

賦二

擬騷

秋色賦

續遠遊賦

迷樓賦

江上愁心賦

梅花賦

擬騷并序

昔屈原放逐作離騷經正潔耿介情見乎辭然而託

物喻意未免有譎怪怨懟之言故識者謂體慢於三代而風雅於戰國乃雅頌之博徒而詞賦之英傑不其然歟予既以愚觸罪久寓謫所因效其體攄思屬文以達區區之志取其正潔耿介之義去其譎怪怨懟之言庶幾不詭於聖人目之曰擬騷其辭曰

帝混元之苗裔兮歷漢唐而揚英散枝葉於天壤兮遭五季而遯族於甌閩皇祖隱德而弗耀兮逮吾親而振名歲昭陽之淵獻兮閏夏甲申吾以降幼倥侗而顓蒙

兮非岐嶷之夙成長遊學於四方兮爰觀光於國賓服  
詩禮之嚴訓兮傳忠孝之家聲攬百氏之所長兮味六  
經之純精常恐不德以怨及朋友兮慕節義於古人豈  
富貴之足志兮冀斯文之可鳴帶長鋏而裁冠兮鏘佩  
玉而琚瓊紉蘭蓀之香潔兮服蕙蒨之芳馨紛吾既襲  
此衆美兮胡敢自謂之脩能誤姓名之上達兮珥史筆  
於彤庭侍穆穆之清光兮聞玉音之丁寧入則陪國論  
於青瑣兮出則扈屬車之清塵惟丘山之恩厚兮何涓

埃之報輕悼姦邪之亂政兮汨正理而不明竊懷憤而  
鬱結兮每欲叩龍墀而力爭惟本朝之寬大兮非有鼎  
鑊斧鉞之刑何羣公之喋嘿兮咸卷舌而吞聲因積水  
之告災兮爰奏疏而上陳庶一言之悟主兮迴天照之  
明明朝抗章而夕貶兮白日不諒予之精誠徒孤忠之  
耿耿兮任萍梗之飄零絕江淮而歷浙兮割深愛於親  
庭陟閩山之險阻兮予隻影之伶俜泛吾舟兮建溪弭  
吾節兮劔浦會計當兮委吏偷燕閑兮莞庫藝蘭蕙兮

九畹植松竹兮百畝餐秋菊兮落英飲木蘭兮墜露朝  
吾遊兮翰墨之林夕吾戲兮圖書之府道既不可以行  
於今兮質聖賢於往古嘉溪山之秀絕兮聊逍遙以容  
與眺翠嶺兮泛清流桂為檝兮蘭為舟有觴詠兮自適  
樂天命兮何憂悼屈原之沈汨兮悲賈誼之不脩笑退  
之之戚嗟兮憫德裕之窮愁惟君子之出處兮貴體道  
以周流自任以天下之重兮何一已之為謀用則行而  
舍則藏兮又何必殺身而怨尤惟蓋棺兮事始定聊康

強兮保天性歲寒不失其青青兮惟松柏之獨正信吾  
道以優游兮始居易以俟命亂曰已矣乎莫我知也浮  
雲蔽日兮虹蜺晝明霜露降此芳草兮百鳥寂而無聲  
恐美人之遲暮兮歲道盡而崢嶸側身西望而歎息兮  
心鬱結而不平心鬱結兮何為道既不可以散兮斂而  
歸之惟靜惟正兮其殆庶幾吾方將與造物者為人兮  
又安能蹠咸彭之所遺

秋色賦 并序

潘岳賦秋興劉禹錫歐陽永叔賦秋聲玉局賦秋陽  
予來閩中七八月之交霖雨乍晴始見秋色因援毫  
以賦之以秋色名篇其辭曰

宿雨初霽大火西流涼生暑退物華始秋李子與客登  
凝翠之閣遊泛碧之齋覽谿山之勝槩嗟草木之變衰  
天高氣清迥無纖埃月出夜涼孤光滿懷李子慨然顧  
謂客曰此古之所謂秋色也客曰願先生賦之李子曰  
唯唯少陰用事金王火囚天地始肅萬物以收故其見

於氣者寂寞憭慄沈寥蕭瑟薄寒中人愴悵悵惻託物  
賦象是為秋色悲哉秋之為色也漠兮無形肅兮無聲  
非赤非白非黃非青爽氣無朕潛來滿盈窅窅悠悠奪  
人目精爾乃桂影扶疎水輪皎潔澹然如水皓然如雪  
風露淒涼星河明滅冷浸空庭蛩螢韻咽此秋色之在  
月也夜氣既除清晴晝宣掃去氛侵靜無雲煙萬里凝  
碧穹隆虛圓蒼茫杳靄不可殫言此秋色之在天也蒲  
柳先衰梧桐早脫飄零委落色瘁香歇惟蘭菊之芬芳

與松筠之茂密露冷風高不改其節此秋色之在草木  
也水落石出境寂雲閒清波如席遠峯如髮煙林映帶  
浦嶼廻環優哉游哉吾方自適於其間此秋色之在溪  
山也客曰美則美矣願先生少進之李子曰陰陽相摩  
日星爭驚孰主張是春與秋兮代序彼春之色一氣藏  
兮下騰上降品物昌兮韶光駘蕩百卉芳兮譬猶美女  
耀新粧兮被服纖麗繡襦裳兮溫然可親象姬姜兮彼  
秋之色一氣清兮天地棼斂萬寶成兮風霜高潔兆嚴

凝兮譬猶烈女懷幽貞兮鉛華不御體端誠兮肅然可敬有典刑兮春之色近乎令而秋之色近乎介是以君子惟秋是貴或感其聲或悲其氣鋪張比興曲盡其態從而賦之於是乎在客曰美則美矣願先生少進之李子曰秋金氣也天地之所以肅殺也其猶介冑之士凜然有不可犯之色者耶秋義氣也天地之所以閑固也其猶節槩之士毅然有不可奪之色者耶秋日烈烈其朝廷之士骨骸之臣正色以率下者耶秋霜言言其忠

義之士社稷之臣厲色以赴難者耶灑然蕭然猶山林  
高蹈之士恬澹寂寞有無求之色也睟然儼然猶盛德  
之士正容悟物有不可親疎之色也若夫廣大清明不  
言而令行無為而物成則若黼座當陽顒顒昂昂朝廷  
正而天下治刑政脩而中國強所謂天子穆穆而淒然  
似秋者其幾是歟客曰至矣盡矣不可以有加矣請辭  
而退

續遠遊賦

并序

屈原作遠遊章句文采瓌麗於騷辭中最为有理致者予方以金仙氏之書灑濯其心慨然思往見之作續遠遊賦以寓意焉其辭曰

悲塵寰之喧卑兮願遠遊以自適恍形止而心馳兮託夢魂而有得漠虛靜以無為兮絕氛埃而奔逸登泰山以小天下兮望滄溟而笑河伯走蒼梧於南荒兮過崆峒於西極忽神馬而尻輿兮歷萬里而一息曾不足以憊吾之志兮將往遊於廣漠之國會萬期於須臾兮步

八紘於咫尺觀天地之所以浮沈兮究日月之所以出入爰整吾御兮駕言西之左王良而右伯樂兮服山子而驂盜驪陟閬苑於崑崙兮見王母於瑤池聽白雲黃竹之歌兮不勝其悲迴車竭來兮巡海之涯聞海中之神山兮有方丈與蓬萊六鰲舉首以迭戴兮仙聖飛騰而往來泛陵波之巨航兮操五種以自隨風輒引舟而不可到兮怊惝怳而傷懷乘風御氣兮造夫天關抵營室厯閭道兮是為紫微之垣執招搖步瑤光兮瞻太一

肅鈞陳乎帝傍玉女投壺而笑兮雷電若以騰奔虎豹  
守關而不可入兮雖欲自達而亡因悵吾將誰適從兮  
其惟西方之聖人嚴清淨之佛土兮闢廣大之法門目  
淨脩廣如青蓮兮古相廣長而無不聞以一音而演說  
兮普滋發於諸根寶樹森以行列兮天華散而繽紛菩  
薩聲聞環以圍繞兮天龍八部儼以威神倏一念而往  
詣兮稽首禮足而欽承俾化人以導予兮遊華藏於無  
垠從一佛國至一佛國兮若河沙與微塵咸廣博而嚴

淨兮羌難得而備云迴視五濁惡世之衆生兮若一器  
之聚蚊怵驚悟而永歎兮何所夢之明明覽六合而遊  
十方兮曾弗離乎一身惟茲方寸兮廓然無際含容大  
千兮山河大地用之以小兮始有分齊如以大海納於  
蹄涔兮如以毒藥置於寶器捨無價之寶珠兮競錐刀  
之末利棄瀛渤之全潮兮認浮漚之微體蠻觸國於蝸  
角兮時相與戰而流血千里南柯夢於蟻穴兮黃梁未  
熟而榮華一世彼區區之利害兮亦與此而何異惟返

卷二  
觀而照寂兮廓靈府於無外泯六鑿於天遊兮其孰能  
以芥蒂由發心以證道兮可一超而已至吾方從事於  
斯兮等浮生於一戲

迷樓賦

并序

煬帝作迷樓於江都鐘鼓嬪嬙不移而具迄今舊址  
存焉因讀杜牧之阿房宮賦感其事作賦以弔之其  
辭曰

隋室方隆削平萬國侈心一開弗安厥宅鑿為汴渠導

河之流曲折千里放於淮陬鳳蓋霓旌錦帆龍舟決意  
東幸江都是遊窮奢肆欲乃建迷樓維樓之制衆巧所  
聚凌烟摘星飛雲宿霧玉柱金楹千門萬戶複道連綿  
洞房迴互翠華戾止杳不知其何所於是選夫燕趙之  
女吳越之姬明眸皓齒豐頰秀眉娥嫋曼睩窈窕融怡  
被阿錫曳齊紈粉白黛綠鳴珮鏘環者充牣乎其間列  
筍簾羅鐘鼓吐清歌呈妙舞以樂之桃李妍芳耀新粧  
也蕙蘭芬馥泛天香也雲舒霞卷繡袿裳也燕語鶯啼

古笙簧也振木飛塵歌聲揚也迴風流雪舞袖翔也雷霆間作金奏鏘也日日薦玉食旦旦獻玉衣隨意所往恩幸則移晷夜寒暑高下東西漠然不分茫然不知矧羣臣之賢否庶政之是非生民之利病天下之安危盜賊斥乎寰宇鋒鏑及乎宮闈身死人手雖悔可追嗚呼噫嘻方其虜陳後主戮張麗華誅三佞人以謝天下一何壯也及其師喪遼東禍肇玄感荒淫不返卒以弑殞又何憊也蕪城之側故址猶存狐兔之所窟穴鼯鼯之

所吟呻霜露梗莽風淒日曛過而覽者莫不躊躇而悲  
辛與夫瓊室喪夏鹿臺亡商吳之姑蘇秦之阿房足以  
致亂於當年而垂戒於萬世者蓋同出於一轍也我作  
斯賦以弔千古之非而為後來者說也

江上愁心賦

我歸自南兮涉千里之長江蘭舟桂楫兮泛煙水之湯  
湯波平風軟兮若枕席之徜徉忽長飈之暴作兮巨浪  
駭以騰驤聲殷殷以雷動兮濤渺渺以雲翔天地馭以

迴薄兮峯巒岌以低昂舟人惴慄而不敢進兮依浦漱  
而深藏紛雨雪之交集兮知極陰之變陽俄雲霧之廓  
清兮升杲日於東方望列岫之參差兮辨遠樹之微茫  
橫中流而弔古兮憑此江以為阻不修德而恃險兮咸  
奔亡而係虜彼六朝之三百年兮竟江山之誰主歷隋  
唐而混一兮迄五季而割據惟真人之龍翔兮削僭亂  
而奠區宇漠然但見山高而水清兮垂二百年不復識  
旗幟而聞金鼓巨盜乘間以竊發兮意欲窺東南而負

固煩王師之出征兮戈甲照於江渚舉太山以壓卵兮  
何孤雛與腐鼠顧生靈之不幸兮一時困於豺虎吾家  
亦避寇而遠適兮方旅泊於異土念親年之已高兮嗟  
幼稚之誰撫幸歸程之不遠兮悵風濤之齟齬方弔往  
而傷今兮獨抑鬱其誰語惟江上之愁心兮結長悲於  
萬古

梅花賦

并序

皮日休稱宋廣平之為人疑其鐵心石腸及觀所著

梅花賦清便富豔得南朝徐庾體然廣平之賦今闕  
不傳予謂梅花非特占百卉之先其標格清高殆非  
餘花所及辭語形容尤難為工因極思以為之賦補  
廣平之闕云其辭曰

固陰沍寒草木凍枯惟茲梅之異品得和氣而早蘇爾  
乃結根蟠據擢幹橫斜發青枝於宿拊未綠葉而先葩  
素英剪玉輕蘂捶金絳蠟為萼紫檀為心藟方苞而露  
重梢半裊而雲深凌霜霰於殘臘帶煙雨於疎林漏江

南之春信折贈遠於知音此梅花之大略也若夫含芳  
雪徑擢秀煙邛亞竹籬而絢彩映柴扉而斷魂暗香浮  
動雖遠猶聞正如梅仙隱居吳門豐肌瑩白嬌額塗黃  
俯清谿而弄影耿寒月而飄香嬌困無力嫣然欲狂又  
如梅妃臨鏡嚴粧吸風飲露綽約嬋娟肌膚冰雪秀色  
可憐姑射神人御氣登仙絳襦素裳步搖之冠璀璨的  
皦光彩燦然瑤臺玉姬謫墮人間半開半合非默非言  
溫伯雪子目擊道存或俯或仰匪笑匪怒東郭順子正

容物悟惟標格之獨高故衆美之咸具下視羣芳不足  
比數桃李遜嫖梨杏推妍玫瑰包羞芍藥厚顏相彼百  
花孰敢爭先鶯語方蟄蜂蝶未喧獨步早春自全其天  
至於功用已周斂華就質落英飄零結成青實鍾曲直  
之真味得東方之正色傳說資之以和羹曹公望之以  
止渴用其材可以為棟梁採為藥可以蠲煩熱又非衆  
果之所能髣髴也爰有幽人卜居梁谿藝松菊於三徑  
樹蘭蕙之百畦丹桂團團綠竹猗猗植茲梅於其間庶

歲寒之相依嗅花嚼實侑此一卮頽然而醉不知天地之高卑豈特泉石膏肓煙霞痼疾殆所謂未能忘情如草木聊託物以娛嬉者乎

梁谿集卷二

欽定四庫全書

梁谿集卷三

宋 李綱 撰

賦三

後乳泉賦

南征賦

椰子酒賦

藥杵臼後賦

荔支後賦

榕木賦

後乳泉賦 并序

玉局翁作乳泉賦妙語雄辯不可跂及然理有未安

者梁谿翁作後賦以訂之其辭曰

客謂李子曰蘇子之賦乳泉也其言曰為氣者水之生而有形者水之死也死者鹹而生者甘甘者能往能來而鹹者一出而不復反也其果是也耶其果非也耶李子曰蘇子騁其辯說之雄詞語之工而有是言也揆之以理蓋似是而實不然也客曰願先生賦之李子曰唯唯盈天地之間為萬物五行最鉅而水其先也散而為氣者水之化聚而有形者水之體也其源必甘者水之

本其委必鹹者水之末也凝為霜雪噓為雲霧結為霰  
電融為雨露凡水之氣升於天者茲非其化耶發為井  
泉滙為沼沚流為川瀆鍾為湖海凡水之形比於地者  
茲非其體耶江河淮濟井谷之泉凡水之源未嘗不甘  
者茲非其本耶滄溟之波斥鹵之地凡水之委未嘗不  
鹹者茲非其末耶箕子之陳洪範論水之性水曰潤下  
自其體言之也論水之味潤下作鹹自其末言之也因  
體兆化則形可以變而為氣故水之升則為雲而雲之

降則為雨是氣形之初無二理也由末歸本則鹹可以復而為甘故海洲之泉必甘而海雲之雨不鹹是甘鹹之初無二味也請觀諸身水之在人為血血有形也流於榮觀則為氣血至鹹也發於漣乳則為甘至於涕唾涎沫亦然漱而鍊之氣灌五臟甘而不鹹由是言之蘇子以有形為水之死而以鹹為死之味一出而不復反也豈不過歟夫木無味也其末為實味斯酸矣火無味也其末為焦味斯苦矣土無味也末為稼穡味斯甘矣

物成然後有味而末者其所以成也五行之理莫不皆然何獨於水而疑之也客曰鹹者水之末而非其死則吾既得聞命矣敢問泉源若一而味有獨甘者何哉李子曰五行相生以金生水物得所生其出乃美故甚甘之泉洞穴之下必有金錫以養之腐敗之井欲變其味必資金錫以鎮之物理之自然也我卜我居梁谿之濱陸子之泉天下所珍甘若牛乳錫山是隣烹茶則芳釀酒則醇可以佚老可以娛賓挈榼操杯酌冷嘗新繞齒

頰之清甘滌肺腑之埃塵折醒愈病益壽延年爰撫松  
而嘯月遂拂石而眠雲優哉遊哉飲水曲肱而枕之可  
以養愚拙而全吾真

仲輔賦西郊見寄次韻作南征賦報之

承嘉惠以南征兮動去國之離愁遠故園而回首兮驚  
歲華之再秋覽廬阜之環秀兮俯大江之東流登黃鶴  
而遐矚兮發孤照之寸眸吞雲夢於胸中兮懷浙河於  
醉裏悵離羣而索居兮寄相思於一水佩蘭芷之芬芳

兮狎樵漁於汝爾終繫羈而未釋兮類斃者之念起荷  
天恩之寬大兮猶坐靡於廩食馳精爽於淮濱兮飛夢  
魂於漠北悵曷日而歸休兮遂東山之釣弋老冉冉而  
將至今豈佳時之再得嘗承教於君子兮竊希風於古  
人慨撫卷而擊節兮如意氣之相親每終篇而自喜兮  
覺詩成之有神惟深藏而密寄兮懼夫妬者之瞋顧戎  
馬之崩騰兮方四郊之多事臨洞庭而傷懷兮望九疑  
而增思亂湘流而適澧兮靈均豈其前身續離騷而賦

遠遊兮願承芳於後塵與日月而爭光兮庶此道之彌新

椰子酒賦

伊南方之碩果稟炎輝之正氣實石綴而晬文膚脂凝而膩理厥中枵然自含天醴釀陰陽之絢緼蓄雨露之清泚不假麴蘖作成芳美流糟粕之精英雜羔豚之乳髓何煩九醞宛同五齊資達人之嗽吮有君子之多旨穆生對而欣然杜康嘗而愕爾謝涼州之蒲萄笑淵明

之秣米氣盎盎而春和色溫溫而玉粹當炎荒之九秋  
寄美人於千里不費餅壘以介壽祉破紫殼之堅圓剖  
冰肌之柔脆酌彼窪樽薦茲妙味吸沆瀣而咀瓊瑤可  
忘懷而一醉

藥杵臼後賦并序

客有賦藥杵臼以示梁谿翁者翁方餌藥扶衰朝夕  
從事於其間欣然喜之拾遺意作後賦其辭曰

梁谿先生年甫始衰憂患之所薰蒸病疾之所摧頽蒼

顏華髮百念已灰乃從方士之流考神農之書擷草木  
之精英採金石之神奇究心服餌以自扶持爰命小童  
置杵臼於齋房邃室之隈方牀曲几之側搗和衆劑服  
之無數俄而聲出於兩者之間合散作止自相撞擊其  
始也投杵於中如穀之舂其聲東瓏其卒也搖杵於傍  
如翼之翔其聲登當倏方鳴而乍輟歟已息而還鏘韻  
和夢枕響落塵梁先生大歡樂之顧謂客曰此吾之無  
盡樂也客曰願先生賦之先生曰唯唯厥初生民百穀

是播斷木掘地取諸小過鑄金象物藥石是資上動下  
止斯焉取斯如鼎多趾如壺闕耳匪貫之鉉載中之矢  
兩金相薄鏘然有聲盪心駭耳鐵中錚錚作非祝故設  
非筍簾疾徐應節疎數合度異鐘磬之四懸謝鼓吹之  
兩部含太和之宮徵信難言而有數蛻投霞舉爵躍鯢  
旋指無私於上下聲不繫於中邊得之心而應於手殆  
有合於天然吾方靜考幽經博極仙方鍊九轉之靈丹  
搗千粒之玄霜借蟾兔於月窟屏雞犬於芝房戒喧言

而默默發妙響之琅琅耳根靈圓心地清凉資一物而兩得殆將乘冷風繭浮雲而翱翔者耶

荔支後賦

并序

宣和己亥歲余謫官沙陽次年夏始食荔支嘗為之賦後十二年歲在辛亥寓居長樂於今又四夏矣備嘗佳品究見荔支本末作後賦以訂之其辭曰

客謂梁谿病叟曰玉局翁以荔支比江瑤柱與河豚豈其然乎病叟曰否擬人必於其倫惟物亦爾彼河豚與

瑶柱在海物而推美厥臭惟腥厥狀惟詭藉薑桂之餘滋  
薦樽壘之芳旨快一嚼而稱珍非鼎俎之正味何足以  
得荔支之髣髴也惟此荔支產於炎方綠樹團團丹實  
煌煌香吐芝蘭液凝瓊漿色味兼美自然芬芳宛如佳  
人麗服靚粧冰肌玉骨錦衣繡裳又如明珠包裹絳囊  
煥彩外耀皓質內光其品則有陳紫方紅江綠宋香細  
若雞舌艷如硫黃虎皮爛斑龍牙銳長蚶殼匾仄玳瑁  
文章皺玉豐膚星毬照江千類萬族不可殫詳夫豈瑶

柱河豚之所能比方也客曰然則何物可以擬之病叟  
曰建溪臘茗仙草之英採掇以時製作惟精蒼壁忽破  
素塵乍驚甌泛霏霏之乳花湯候颼颼之松聲滌煩蠲  
渴愈病析醒此亦天下之至味也洛陽牡丹百卉之王  
鶴白鞞紅魏紫姚黃嫣然國色郁乎天香豔玉欄之流  
霞列錦幄之明釭價重千金冠乎椒房此亦天下之至  
色也相彼二物標格高竒名雖一概種有多岐絜長度  
美可並荔支永叔君謨序而譜之如三國之鼎峙各擅

據於一陞角力爭勝未可以決其雄雌也客曰臘茗牡丹則吾既得聞命矣敢問百果之中孰與為比魏帝方之蒲萄唐人推於綠李亦有謂乎病叟曰荔支之生厥土惟三西則巴蜀連亘嶠南肉薄漿多酸而不甘與閩粵之所產殆不可同日而談也漢貢南海唐驛西川皆荔支之下駟乃並驚於中原當時所見得其麤焉宜乎品藻之失而議論之偏試使閩粵者進則二果慙慙將遜美以推先而況其凡乎若夫洞庭之柑瓢凝玉雪清

香濕手累日不歇苔雪之芡實侔珠璣咀嚼不倦玉池  
生肥思其次焉亦皆荔支之亞匹也然柑可食而不可  
多芡療饑而不療渴惟食多之益辦與飢渴之兼解微  
荔支吾誰與歸方將休影息跡遺物離人倒冠落佩買  
山灌園植千種之陸離擇萬顆之勻圓上滋絳宮下灌  
丹田怡性養壽超然自得以盡吾之天年子能棄世事  
而從我遊乎客默然慙逡巡而辭退

榕木賦


并序

閩廣之間多榕木其材大而無用然枝葉扶疎庇陰  
數畝清陰人實賴之故得不為斧斤之所翦伐蓋所  
謂無用之用也感而為之賦其辭曰

南有巨木其名曰榕下蟠據於厚地上蕩摩於高穹雨  
露之所霑潤雷霆之所震聳日月之所照燭乾坤之所  
含容與衆木均夫何賦形稟氣之獨不同也爾其擢餘  
敷條輪囷離奇結根植本拳曲擁腫口鼻百圍之竅穴  
龍蛇千尺而飛動仰視俯察何規矩繩墨之不中也高

明之麗非棟梁之資斲削之工非俎豆之奉以為舟楫  
則速沈以為棺槨則速腐以為門戶則液以為楹柱則  
蠹薪之弗焰無爨鼎之功燎之弗明無爇火之用蓋枵  
然之散木徒萬牛之嗟重宜匠石之不顧同櫟社而見  
夢然而脩枝翼布密葉雲濃比結駟之千乘象青蓋之  
童童夏日方永畏景馳空垂一方之美蔭來萬里之清  
風靚如帷幄肅如房櫳為行人之所依歸咸休影乎其  
中故能不夭斧斤梧擊是免雖不材而無用乃用大而

效顯異文木之必折類甘棠之勿翦立乎無何有之鄉  
配靈椿而獨遠不然則雁以不鳴而烹漆以有用而割  
犀象以齒角而斃樗櫟以惡木而伐處夫材與不材之  
間殆未易議其優劣也



梁谿集卷三